

## Izvršni direktor CER-a sa predstavnicima željeznica u BiH



Izvršni direktor CER-a (Zajednica evropskih željezničkih preduzeća i kompanija infrastrukture) dr. Libor Lochman boravio je u službenoj posjeti Sarajevu 25.06.2015. godine i susreo se sa predstavnicima željezničkog sektora u Bosni i Hercegovini.

Cilj posjete bio je upoznavanje CER-a sa trenutnim stanjem željezničkog sektora u BiH i njegova spremnost da se prilagodi procesima integracije. Poseban naglasak stavljen je na usklađenost BiH željezničkog zakonodavstva sa direktivama EU i restrukturiranje željezničkog sektora.

Predstavnici željezničkog sektora upoznali su dr. Lochmana sa trenutnim stanjem, neminovnom procesu restrukturiranja i problemima sa susjednim željeznicama koje striktno primjenjuju evropske direktive. Primjena ovih direktiva u prekograničnom prometu dovela je željeznice u BiH u nekonkurentan položaj, zbog čega su morale ukinuti većinu međunarodnih vozova.

Dr. Lochman je izrazio podršku željezničkom sektoru u BiH, ali i zatražio veće angažovanje kako državne tako i entitetskih vlada, te jačanje krovnih željezničkih institucija sa naglaskom na BHŽJK, s obzirom na njen veliki značaj. Rekao je da je od krucijalne važnosti da entitetske

vlade i željezničke kompanije potpišu višegodišnje ugovore o održavanju željezničke infrastrukture i o sufinansiranju putničkog prometa, te da se ti ugovori realizuju.

Govoreći o primjeni evropskih direktiva u prekograničnom prometu, dr. Lochman je rekao da to mora biti u obostranom interesu susjednih kompanija i da ne smiju derogirati međusobno potpisane sporazume koji su još uvijek na snazi.

Imajući u vidu stanje željezničkog sektora u BiH, dr. Lochman je ukazao na to da su vlade obavezne tretirati željeznički promet na isti način kao i cestovni, te da ukoliko nisu u stanju to da učine, da donesu odluku o tome, a da se kroz parlamente trebaju vršiti pritisci na vlade da ispunjavaju svoje obaveze prema željeznicama.